

煙
嶼
樓
詩
集

烟嶼樓詩集卷十四

鄞 徐時棟柳泉稿

慈谿葉鴻年吉甫刊

五律下

哭邵丈海門

濤

豪興眼前在難忘是此翁笑談驚左右嬉戲尙兒童
摹帖初晴後栽花細雨中只嫌社公酒未肯與治顰

二

仲夏一相見爲翁開舊醅出門從此少壯志未全灰
旣病猶垂念來看覺已隤俄成千古別空奠菊花杯

三

隔水昔三老

謂丈及王丈月農湯丈耕吾

蓬門時一敲蕭疏飛雪鬢

慚媿忘

去

年交斗酒互爲主新詩同見鈔不堪都去盡

冷落月湖坳

鄭弼庵孝廉

聖賜

母金太孺人挽詩

慚媿黃裳客東湖四度過家風荆布舊陰德里閭多壽
母方榮世諸兒早掇科佛桑遭阨閨淒絕是蒿歌

奉懷朱小竹先生

緒

去歲草堂至匆匆遂別離重來是何日久不見吾師定
稿新添幾傳經近屬誰春風湖上席卻憶少年時

二

自返故鄉後揚亭道路舒

先生生長榆莢村後來寓居湖上數載近復還故鄉佳

兒應大可新婦復何如

先生子竹孫詩禮承家久桑麻以今年續昏

課績初桃源殊不遠載酒訪蓬廬

三

豈有先生者而終老輶軻生涯隨分足大器晚成多飢
火驅奔走雄心半折磨問天天不語看劍欲狂歌

四

弟子城西住科頭嬾出門著書聊遣興無佛自稱尊萬
卷焉能破千秋未易論異時重請益隅坐倒清樽

明相余文敏公以東錢湖月波寺故址爲五柳
莊久之莊廢仍爲寺而祀文敏於寺中咸豐六
年九世孫承樑重新堂宇余旣爲之記明年正
月十有七日奉安戒禮同人集寺謁拜卽事有
作

東錢湖上路三度記曾行未到月波去此來春水生帆
隨風尾轉山與樹頭平攜手同登岸衣冠野鳥驚

二

果然名勝地風景壓全湖昔日況臺榭茲山眞畫圖門
甬雙闕迴寺關一山孤三百年來事田園已盡蕪

三

天子宣麻日先生種柳年名山開洞府平地失神仙未

了歸田願空甯記勝篇定應魂魄戀奇夢到西偏文敏

將成而入閣命下神宗書名山洞府四字賜之後薨於

位不及歸也其樓閣門徑悉摘歸去來辭命名事詳集

中自記及莊廢為寺祀文敏殿隅寺僧塑三官像復遷

僻地道光開寺中新作西樓文敏示夢於湖上忻君謂

所居湫隘蓋遷我西樓覺而奇之且不知寺有此樓

也往視果然乃奉祀樓中至是承樑始改祀之西廊

王日字
字精當

四

尙識清高像因緣傍佛門滿山無故宇九世有賢孫史

傳千秋缺心香一瓣存直翁先到此誰爲賦招魂謂南

宋史

越王
浩

五

鄮峯真隱老曾此結槃阿先墓營湖嶼層樓翫月波山
容今古在人事廢興多我欲祠高躅同畱掌故科越王
自號
鄮峯真隱其先墓在湖上今墓工所稱史墓者也又卽
此地建月波樓後廢爲寺月波寺之名昉此余謂一寺
關宋明兩相古蹟今旣祠文敏
於右廊其左廊宜祀越王也

六

更尋幽勝去寺後樹蕭蕭洞古高於屋春陰暗似宵御
書摩斷碣遺像認前朝蝙蝠知何處空山總寂寥寺有洞
盤甌而成爲當時莊中一勝以奉其父母二像者今裝
色剝落殆盡而狀貌依然是日尋勝至此遙見太夫人

背倚一石隱隱有字余入洞中手扶像起摩識其文則
洞府二大字端書後二行小楷云萬歷九年冬臣有丁
恭摹上石蓋所鐫卽神宗御書而名山二字斷落不可
問矣相傳此山洞中舊有白蝙蝠大於雞余尋之不可
得

七

相國諸孫子相邀過此鄉野僧畱客嬾古佛看人忙
壁慙新記題詩屬和章登臨不盡興放棹已斜陽

劉曰紀河閒謂東坡五言律皆氣機流動由其一筆
寫出不山堆砌而成吾師謁余文敏祠七章亦純以
氣運無復筆墨之痕

鳥曰俛仰今古寄慨遙深茲游得

茲詩名山與賢相竝傳不朽矣

童曰有記敘有旁及有感慨有摹繪色
色俱到筆筆凌空七詩當爲五律壓卷

同葉小峯同年維藩季弟石門泛舟遊林氏夢

園

聞說城南路名園綠水邊扁舟才一到小築已三年位
置天然別登臨我亦仙何當攜斗酒蕭爾話林泉

二

樓迴深深接山低曲曲通小窗皆已亞老樹自西東烟
靄微茫裏人家指顧中更臨池水上濠濮興相同

三

舊日農耕地新來已闢町短牆圍菊圃幽徑出雲亭牆
外有小亭童丈蓀豔色春都是奇花眼未經自慙斯事拙
君顏以團雲

小立問園丁

四

園外更何有縱橫復結廬一庵新供佛滿架亂堆書
有庵曰無庵以供種種因緣見無無色相如庭前千
冬心居士所畫佛像
个竹欲爲證空虛

五

遊倦將歸去同行尙戀斯到門無俗客題壁有新詩
寒食初過節斜陽欲下時草堂殊不遠應自悔來遲

遊夢園後月餘主人林小屏約以午日過其園
中遂自月湖泛棹出甬水門重遊是日陳鰲仙

明經張米叔同年慶璜秦和卿孝廉運錦同在

園中卽事有作

有約看花去。名園我復來。解舟穿島嶼。出郭指樓臺。會得故人聚。因之懷抱開。十年前事憶。梵宇共徘徊。丙午同明經遊壽昌寺觀浮橋及李次公畫十八羅漢像時余有詩記之今復以午日與明經遊覽斯園回首前事

周矣

鳥曰每歎眼前景他人或數十語不能達者作者輒以一二語括之如此詩次聯是也且非特敘事明了而重游亦復宛然

二

庚信園名小林。逋鶴未歸。野花迎客笑。水鳥背人飛。坐

永尊前話涼添雨後衣。餘醺三十本欲向乞芳菲。

草堂卽事

觸熱時來客看書。嬾出門。蓮房新結子。蘭榦已生孫。從好誰求富。無憂我自尊。狂風聞不害。穰足報江村。

烏曰五六
卓然名句

寄余萼沚

有序

五柳莊斷碣及文敏父母像皆在月波寺後洞中。余嘗屬萼沚候斷碣於寺中祠壁而遷二像於大宗祠。聞尚未舉行。故復以此詩敦迫之。

昔時湖上去我獨上嶢峴。叶斷碣前朝字荒山故相園。

礙衣多枳棘。拜像識椿萱。位置曾相告。憑君勿忘言。

傅心芝大令

自銘

死事於上高縣

轉戰圖恢復。倉黃復引兵。丈夫終死國。遺恨未收城。斷臂心猶壯。歸元面若生。數行

褒恤詔。忠勇史官旌。

二

纔脫廬陵情。旋歸望蔡喪。

王琴仙太守本悟以前一年殉節吉安府吾鄉宜江西者

繼二人至是幾人官此士大節炳吾鄉刀劒都陳座櫬而君復死之

槍尚有芒。諸君英爽在。應其下朱航。

童曰阮結語慨想當時之無人

張東玉中翰士珣挽詩

自我城西住爲君水北鄰。去來情更密談笑意都真。話
舊追先世論文記宿因。君與余同試郡縣受知於程大令朗亭呂太守仲英兩師其後
同試雲石山房復受邇年人事變抑鬱總難伸。知於李觀察曉園師

二

餘蔭承先業生來安樂窩。未堪身世累遂覺苦辛多。閱
歷紆籌策心神費折磨。照人畱古道欲問命如何。

三

有客談星命。謂馮今秋謂不祥。此時君健飯頗怪語荒。
唐不幸而多中斯人未可亡。露珠弓月夜。君卒以九景月初三日景

色太淒涼

雨中登瞻琦嶺絕頂

嶺路何年闢。彎環十二重。忽驚無上界。已到最高峯。髮
爲天風櫛。衣沾澗霧濃。南東山下畝。大雨慰耕農。

二

一望盡空闊。眾山無與齊。眼中滄海小。天半白雲低。雨
色寒蒸樹。泉聲亂入溪。重遊待晴霽。萬里不應迷。

童曰。末用虛寫與游響。
嚴念之意。常惡句並妙。

陸曰。二詩筆健。
如俊鵲摩空。

瞻琦有序

瞻琦距縣將百里。背山面海。明初設汛。其地始移民。
居之。成大聚落。海中之琦頭洋在其東。烏琦山在其
南。登高可瞭望。故名瞻琦。而村人以爲瞻岐。誤也。咸
豐九年。村外新築海塘。開闢塗田。余同諸君往觀塘
事。客村中周氏者。十餘日歎其民物富庶。風俗敦厚。
卽景成詠如土風焉。

萬嶂圍三面。千家自一村。早潮登蜃蛤。斜日下雞豚。桑
柘牆陰密。衣冠古處敦。不須宵擊柝。高卧闢重門。

二

百里遠城郭。眞成安樂窩。水清爲酒旨。土沃有年多。暑

升。嫻。詩。禮。功。名。重。甲。科。山。邊。勸。書。院。好。去。聽。絃。歌。村人
合建

瞻琦
書院

三

更。向。前。村。去。溪。橋。壓。水。平。蟹。人。修。破。網。浣。女。闌。初。晴。生。
計。饒。山。海。鄉。風。半。讀。耕。憑。高。試。登。眺。遙。見。大。嵩。城。

四

閒。說。湯。襄。武。移。民。到。此。來。負。山。初。建。國。傍。海。尙。畱。臺。經。
創。前。朝。古。農。疇。繼。世。開。無。窮。延。地。脈。又。看。闢。汗。萊。海邊
漲塗

次第成田近又
開墾可得萬畝

五

萬杵登登築來游到海邊下方新畜淡高處已連阡虞
芮何年事滄桑此日田夕陽明兩岸人坐渡頭船對海為定

海廳地以舟渡海頃刻可到

董曰詩中有畫

六

南望州昌國元昌國州即今定海廳東連縣泊潮宋人呼鎮海縣為泊潮縣海岸

穿鼻山兩縣時清無戰艦泥滑有飛橈潮退後土人以拾海物舟甚小一足舟中一足舟外

推行如飛或即大禹四載遺製與碧淖天開險數十年來

漲塗日遠海溢不紅爐海作燒海濱多煮尚餘防戍卒

能上無煩防汎國朝立汎仍明制額設

頭白混漁樵守兵戰兵馬兵各若干名

陳曰視舊誌所載呂山人諸詩有其過之無不及也

陸曰六詩捶字必堅鍊詞必

雅置之杜集中幾不辨楮葉

童曰節次寫來人情風俗歷歷如見妙筆也杜老詠風土如是如是又曰第三四首當爲六詩之關鍵

贈周翁君綏

曾與翁無素相逢意便傾自言方病足不得伴山行雞黍田家味桑麻隱士情賢孫氣軒豁剪燭話生平

由寶巖山至戴公嶺

萬樹長松下盤輿曲曲過水清魚樂見春暖草香多世態消魔障天風滿湖阿山深雲在谷隔嶺有樵歌

張鑑山廣文

炳奎
挽詩

荷。鋪。劉。伶。願。眞。當。化。酒。壺。浮。名。原。冷。淡。大。事。不。糊。塗。豹。
吠。聲。何。急。烏。私。淚。欲。枯。那。堪。羣。季。對。其。惜。一。荆。株。
用庾子山

鳥曰首四語
爲廣文寫照

送張米叔同年司教定海廳

送。子。鄞。江。上。琴。書。共。一。船。冷。官。棲。海。國。蜚。雨。雜。蠻。烟。變。
夏。悲。今。俗。移。風。緬。昔。賢。青。甌。商。舊。學。好。關。野。狐。禪。

二

昔。者。吾。良。友。淵。深。媿。弗。如。宋。元。搜。祕。笈。典。詠。勒。新。書。子。
有。斯。文。責。人。當。問。字。初。此。邦。知。愛。惜。定。爲。覓。鈔。胥。
吾鄉地志

莫備於定海宋寶慶元大德二昌國志余既刻於宋元
四明六志中明志亦有存本聞國初聞崑泉所作舟
山志尤佳余未之見也近時朱司馬述之先生嘗以夷
難後收復定海到此因搜羅掌故囊括古今為昌國典
詠十卷考此邦事蹟者今莫備於此書矣書稿在吾家
若此邦人士能為之謀剗剗真不朽盛事故因送君也
而詳言之

三

島嶼浮空見吾家古蹟多徐城今在否遺廟近如何徐
王避楚至翁洲始見史記正義所引括地志中翁已
洲即定海也故徐城及王廟定海新舊志並載之
經滄海身應到普陀胡僧倘相識清話夜婆娑
遊昌國
時事

四

把酒論形勝。當年卽東臨。風一懷古。爲我弔三忠。丑殉節。三將軍。潮湧連天白。城孤落日紅。和歌慷慨以慨遲爾寄。詩筭。

建隲山中

山中何所有。好景不勝收。巖瀑白於雪。野花紅到秋。笙歌禽五色。奴婢橘千頭。若更載書去。何須萬戶侯。

陳曰三四天然佳句

陸曰神似開府

行人入建隲。偶摘一橘爲守者所見。償之不啻百倍。讀少陵金橘不論錢之句。爲之浩歎。

金橘山山熟行人但許看滿村譁掩獲令我發長歎可
解梅林渴毋彈李下冠鄉風真負義大劫豈無端陳舜
俞都
官集山中詠橘詩云有義曾分客自注
云山中橘熟時見客來者無不分贈

李義山舍人

炯

挽詩

有序

君常以忠孝自任家在鄆南鄉隻身避寇江北流離
顛沛中每恐家人有陷賊者悵悵成病今年三月閒
忽譌傳賊掠南鄉全家被陷挺牀大叫遽仰藥死前
年君司訓金華聞賊警以死自誓會賊轉而西去得
從容解組歸里門至是而終殉之可哀也同治元年

秋九月

隻影流離日蒼涼病未蘇妖氛春盡惡淚眼望中枯宦
海身猶在家山死不孤吾友鄭弼庵舍人聖先君數月絕粒死古來忠孝
事何意諒庸愚

陳曰人生得一知己足以不恨死而有
知當復如是一結足令九泉瞑目矣

同治二年正月有懷次女時方從其壻凌定甫

孝廉忠鎮客京師

失恃猶年少常依大母傍教非嫻保姆身已事姑嫜不
幸逢新亂從茲更遠方遙知四千里憶我鬢蒼蒼

鳥日結語反用少陵
月夜詩意別有情致

二

五十行年至吾衰難具陳齒牙多脫落哀感況頻因去年

四月仲兄長子隆章被掠閏八月間伯兄仲子隆德病卒大墩祠堂中今年正月二日德婦又故亦有

名山業而遭劫火新屋亂中吾以著作一巨束藏金巖石

視之末遭兵燹而竟近來聊坐憶燈影夜常親

被焚如亦怪事也

三

別汝前秋暮而今又歲初少時多病痛客裏復何如場

女知悲感客夏在上山天弗歎吁郎君應有信候看弄

璋書

陳曰神行官止如寫家書忘其為律句

挽周廉泉同年 紹濂

下第南歸日扁舟我與君此行踰市月後曾總浮雲薄
宦長爲客彈琴未策助江南有循吏吾黨惜離羣

烏曰市月浮雲是熟極後自在流出無心湊巧不比尋常借對俗派

二

聞道周明府儒官有將材夜馳鄰縣去手縛賊王來籌
策聞中定荒蕪亂後開至今三仕處丹徒金山華亭士女尙餘
哀

烏曰生氣勃勃

童曰一氣奔注熟極而流是舍人擅場處余尤愛其有頓宕有提掇否則非直下卽平衍矣

老屋

老屋三閒在天畱劫後棲室眞容膝小牆有及肩低急
雨蛛收網狂風燕落泥垂楊依舊綠高蔭敞廬西

烏曰急雨一聯乃閒中有得語不圖
劫後有此靜恬之況舍人眞異人也
童曰舍人客慈谿而家遭說回之變及急足報至時
方置酒高會滿座驚歎失色舍人笑曰不可以一人
向隅而四座不懽卽復命酒重酌明日歸來慰弔盈
門舍人處之恬如但稱命數而已蓋其胸襟實有不
可測者因讀此詩見烏君
評語遂并識其本事如此

挽董面軒孝廉

灝

訪我冬將盡知君正養疴已難驅晉暨姑爲覓秦和京
國醒春夢風華付逝波江湖夜淒惋那忍聽蒿歌

挽王小竹引孫

與世混相濁，儒風不脫難兩辭。

徵辟詔一任廣文官，繪事成虛諾。今夏過余草堂，以余劫後圖書無存，將作

畫贈詩情待細看。君嘗屬余訂定詩稿青箱傳舊學，蕭瑟爲君歎。

余卒後十餘日，令子改夫廣文繼卒。

陳曰：起二非深交，真交不能作此語。

劉曰：挽詩例多酬應，而吾師諸作多表明心跡，存其梗概，後有讀者可以想見其人之生平，如此篇與前

挽李舍人諸詩尤其著也。以詩傳人不媿詩史之目。

老友話舊意，似抑塞用賦五言以廣其意。

同學少年子，紛紛在上頭。名將高一世，士各有千秋。

命文章賤。無才飽暖羞。老來應努力。慎弗念沈浮。

雨後山中

雨後天初霽。陰晴尚未分。壯心奔峽水。遠志在山雲。野
草纔能活。新松漸不羣。蜜巖如此近。欲向覓鴻文。

五排

范汾生夫子

上緯

挽詩

弟兄陪絳帳。春滿鏡湖前。憶昔追隨日。於今廿九年。城
西謀老圃。屋外接廉泉。有約高軒過。空期好月圓。去歲
遷城西與先生居甚近。先生約今年。掘衣商。遽密撰。履
正月望日過草堂一飯已而不果。亦遷延。元未分揚草。詩曾受鄭箋。傳家儒素業。杖國地

行仙淡飯粗衣樂栽花種樹緣座堆都講籍門繫孝廉
船願已三生了天畱五福全光風餘綠帶秋氣冷青氈
李漢收遺集還當作序篇

童曰三
國妙對

烟嶼樓詩集卷十四

男隆壽平甫校字

烟嶼樓詩集卷十五

鄞 徐時棟同叔稿

慈谿葉鴻年吉甫刊

七律上

童曰大將諸將詠漢史懷裕大將軍及游杭集中表忠觀諸作氣韻沈雄識力超卓幾於空絕前後至入己酉以後諸詩則命意深遠措語又極和平格律漸入老成矣

春陰

重疊行雲出岫忙。雨晴不定似商量。初三夜月逢寒食。十六番風到海棠。草色上階青帶潤。簾紋如水綠生涼。詩囊入夢頻搔首。何必楊花落滿牀。

舊評王綱齋師曰三四鉤
取題神是追魂攝魄手段

贈鍾雲屏

市上吟聲是也非。鑪邊鐵隱有雲屏。翁以冶錫爲業而能詩余稱之治師

爲人呼新翻樂府黃棉襖舊署明州老布衣。死別生離

知己感。翁始學詩於其故友陳夢回又極爲浩歌悲嘯

賞音稀。翁送陳丈詩有云五千里路相思苦六十年人

之白頭詩事須珍重如此江山力亦微

同人賦西郊古蹟得鸞脰湖

我來話舊廢湖邊。世事滄桑總偶然。一水豈知關大利
七鄉從此失腴田。相傳一萬二千丈曾歷三朝六百年

過望春山長歎息不知何計保東錢。望春山在舊鷺脰湖中鄧東西兩鄉復之理而東錢湖亦復多私佃之者且復淤泥日積蓋湖小於舊者什五六矣

二

欲造夷船費不貲好湖池卻為高麗幾年薄賦窮黎累。初廢湖時募民佃田但稅官賦賦較重於他鄉而無田主之租故民爭佃之且德廢湖人至為之立廟豐惠廟是也其後復相賣買於是田租如他鄉而官賦大一片重賜時雖經奏減然不能盡減至今終為民累耳一片深情快壻詞。王正己作廢湖辨謂湖輕廢尚當閒暇日議興況在靖康時可憐功德無窮盡簫鼓年年祭太師豐惠廟俗名樓太師廟

柳汀雅集賦夕陽

夕陽緩緩下平田。無數樓臺映水邊。燕子歸來雙剪影。
鷺鷥飛破一村烟。溪山茅屋尋僧路。門巷蓁衣賣酒天。
風景蒼茫無限好。試看春漲兩湖前。

二

雨後閒雲淡淡行。畫圖萬變是初晴。小年長日三分在。
近水遙山一半明。江上烟波遊子恨。天涯離別故人情。
短衣小立柴門外。村後村前打稻聲。

三

荻花楓葉作深秋。一抹殘紅罨畫洲。江岸平鋪分草色。

人家收起在簾鉤。宿寒蘆雁飛流水。打暮鐘。僧上破樓。
歷亂野航歸去急。幾多帆影落平疇。

四

疏林斜出是官橋。隄上行人覺路遙。衰草荒城臨古渡。
中原舊壘認南朝。殘陽西下太容易。江水東流總寂寥。
惆悵何人懷故國。黃昏時節有吹簫。

陸曰夕陽春草
諸詩酷似義山

次韻答韻仙

不見何生去後文。近來我亦嬾於雲。風催花信連番到。
酒占詩腸一半分。渺渺春波重惜別。
時王丈獲軒及趙粹甫張葆宰皆將

遠赴京師。淒淒夜雨。況思君尋常著屐。非吾好欲訪蓬廬。待日曛。

烏曰此下二十餘首皆舍人少年之作諸君頗有欲刪去之者余謂舍人七律凡三變始尙清新繼歸雄健近時則以眞實和厚爲宗合觀前後似出兩手要非並存之不足以窮其變境耳

次前韻送趙粹甫

從今日下好論文。健翮摩空萬里雲。合座杯飛行色動。片帆風緊浪花分。少年豪興卿知己。春水長江我送君。他日相思何處是。淡烟鄉樹帶斜曛。

次前韻送張葆宰

傳經家世有鴻文。衫袖飄飄氣貫雲。春色東來京國滿。

潮聲西去大江分。風生快論曾驚我。己亥七月同客錢唐寓中縱論史事
月照浮梁定憶君。不爲送人思作郡。書籤萬卷映朝曛。

次前韻贈陳子相

白髮燈前手我交。情兩世賦停雲。

謂尊甫西耕先生

忽驚先

輩風流盡。

先生君沒後十二年先生亦歸道山

可使吾曹意氣分。一夜清

談新益友。十年名士舊徵君。何時再駐湖頭馬。坐看歸

鴉掠暮曛。

次前韻贈王稽雲

湖水如天浪有文。科頭一笑見稽雲。人來暮雨輕衫溼。
簾捲東風斗酒分。座上縱談應讓我。夜深高枕獨憐君。

別顏不了相思意春樹蒼茫隔浦曛

次前韻卽事書懷卻寄韻仙

一本梅花一卷文此時意氣宛凌雲綠波春漲人爭渡
紅樹烟多鳥欲分美酒十千酣過客異書三萬傲封君
無端屢疊何郎韻卻爲詩成恨夕曛原唱末韻用夕曛和之者頗無別意
可選故篇末微調之

前余贈子相長句子相旣次韻報余二月二十

八夜忽夢見之明日薄暮而贈詩又至始知昨

夢之非無因也仍次前韻集唐人句卻寄

緣情何幸枉高文遙結芳心向碧雲生計拋來詩是業

報章重疊字難分。今朝一望還成暮。昨夜三更夢見君。
惆悵舊遊無復到。水邊風日半西曛。

次前韻再集唐詩贈韻仙兼示子相稽雲

前度相逢正賣文

前余與韻仙同爲人作駢體壽言

一朝消散似浮雲

花鬚柳眼各無賴。蓬閣桃源兩處分。直道相思了無益。
不知何地再逢君。簾前春色應須惜。閉閣陰陰日復曛。

郭曰集唐皆自出機杼不同抄撮

再次前韻寄韻仙并約閨重三之遊

下筆全無出世文。歌聲那得遏行雲。主慙遇敵三人勁。
僮怨投詩兩地分。

子相稽雲同館陳氏韻仙館楊氏相去數里

隔嶼每懷何

水部比鄰絕少下田君頗聞欲作登樓客看劍彈琴其
坐曛

二

乞靈曾借古人文知向城東憶范雲三月已看新置閨
四時誰道各平分用元微之句明朝小飲遊丁市今夜長吟
共卯君謂子舟上巳天教作良會湖邊一抹放紅曛

烏日平分四時語出九辨詩人沿用久矣此乃謂春
多一月不得平分句則仍諸前人意則與之迥別推
陳出新其妙
全在上句

春草奉和馮柳東先生登府韻

輕雨輕晴放鶴天落花時節草芊緜翠邊金粉嬉春路

綠外紅旗賣酒船。蝴蝶翅粘歌扇底。靡蕪痕上舞衫前。
細奴攜榼城郊去。寒食人家拜墓田。

二

歸夢迢遙客未還。東風吹綠到人閒。江籬無種年年遠。
野館誰家寂寂關。襟上淚痕湘浦雨。馬頭春思潁陽山。
天涯徧地淒迷景。別恨如斯不易刪。

三

漢苑無人問馭娑。荒荒城郭淡烟拖。醉中憑弔皆陳迹。
天末相思付逝波。舊恨六朝殘夢短。平蕪千里夕陽多。
閉門要路都生徧。欲乞山閒薜荔阿。

鳥曰押多
字名貴

四

萋萋不斷路三千已掃匈奴尙戍邊斜日昏黃嘶馬地
滿山濃綠射鵬天可憐青冢成焦土但見白楊生野烟
鋪徧沙場容醉卧酣歌莫問酒家錢

王曰此非作者本色
詩存之以備一格

再詠春草次馮太史師韻

門前寒碧接荒城野色搖空暝色橫天意似憐燒易盡
人閒無種斷還生翠痕都入家山夢錦道重翻樂府名
澗谷采香沿故事促裁春服報初成

二

折柳章臺日半斜。眼中秀色徧天涯。人歸陌路春三月。
夢醒池塘手八叉。荒野縱橫迷舊跡。淺叢點綴卽閑花。
榮枯瞬息尋常事。惆悵何須感歲華。

再和

春色隨人卻上城。晴川歷歷遠山橫。寸心宛轉相思種。
一意纏綿努力生。遊客踏莎新唱曲。女兒鬪翠各呼名。
兔葵燕麥渾忘卻。泛淥歸來句已成。

鳥曰三四亦復纏綿宛轉抵得六朝人春草賦
一篇又曰全不黏說春草卻移換他題不得

二

掃石題詩字半斜。生機從此悟無涯。空庭有影飄書帶。
廢圃何人負藥叉。杏子衫邊飛絮影。橘皮鞵上染苔花。
流波數尺南谿路。沈醉東風玩物華。

三和

吹到幽香滿洛城。油車斜出路縱橫。水邊濃翠山邊淡。
霜後枯根雨後生。蠟屐又迷桃葉渡。粉牆新記野花名。
拂箋試畫青蔥色。一種閑愁寫不成。

二

鞭絲柔軟帽欹斜。春事撩人未有涯。莫唱尊前金縷曲。
教尋陌上玉鴉叉。踏來晴翠聞啼鳥。點破香痕是落花。

莫怪舊時詩，恨在五侯門外總繁華。

郭曰春草諸詩似查初白

杏花次馮太史師韻

江南消息雨聲闌，院落深沈十二千。卅里好花天上種，
萬家春色馬頭看。帽欹疏影絲鞭緩，簾挂東風玉笛寒。
第一生香標品格，錦城桃李已開殘。

避地它山贈徐秀才

兆蓉

生少無爲忽亂離，倉黃聊借異鄉枝。當君絳帳談經日，
時君館它是我青山避寇時。粉社衣冠看不異，桃源風景
悟如斯。蘭江蕙水悠悠在，極目烟波總自疑。

二

自來秋半已經冬。寒夜孤燈意萬重。
長鋏不歸空寄食。小人有母尙尸饔。
輸君桑梓承歡久。君居許家橋下與它山才隔一水
悵我雲山負米從。旅館憂愁勞白髮。
邇來非復舊時容。

童曰情文俱至

三

每同樽俎露風裁。春樹秋雲望我來。
把酒當年知子面。憫時今日見君才。
憫時君新作關山已擲人何往杼柚將空意可哀聞說文章堪報

國幾人挾策上燕臺

四

官奴城外急奔瀧。連歲兵塵滿海邦。天劍未曾清甬水。
妖氛又說起姚江。縱銷古堞空威遠。招寶山上舊有威遠城近聞已爲夷
所好洗明山築。受降不敢告人聞。有命上元應許買歸
艘。

烏日落
句蘊藉

大將

恭承

詔命人江東。指顧平蠻膽氣雄。大將視師猶竟外。累臣
歸骨已舟中。受纓信有終軍策。賜樂誰論魏絳功。文告

徧傳長歎息伊人失計是和戎

二

卷甲投戈罷戍邊夜來幕府令喧傳安排廬井多新作
歡笑雞豚解倒懸不信亂生真式月豈知狄至在期年
賈生肯有欺人語係頸單于早眼前

烏曰五六何切合乃爾
隸事至此歎觀止矣

三

偶來浦溆任徬徊不料情傾轍亦摧陷淖尙思游涌逸
獻俘爭看赤江回一舟遊戲海濱潮退舟人未妨快意誅
長鬣何必騎心膊就魁聞道將軍謀靜鎮新來千騎乍

驚逐

四

重兵良將守彈丸。叢爾孤懸膽亦寒。原爲版圖收既失。

已忘軍志退知難。海邦昔日常資寇。翁山自唐德宗朝爲海寇袁晁所據

久不克復遂廢不治。歷五代至宋神宗始立昌國縣。翁山昌國卽今定海地也。

昭代初年未置官。國初地爲遺頑所據。至康熙二十六年始立縣。莫謂無人。

謀不用罪臣臨別。早悲酸。謂林制軍

鳥曰五六接法直過少陵

五

飛礮如雷曉夜喧。羽書歷歷望兵援。帳中四面歌聲慘。

海外孤城士氣冤。猶使解揚來。詎宋可憐。先軫竟歸元。
謂守定海三總兵江心古寺招魂奠。何日奇功慰九原。

六

海上危峯鎮不移。地形天險界華夷。雄關已擊重門柝。
閒道曾無一旅師。晉國山河原表裏。衛公陣卒太支離。
平倭尚有前朝碣。斜日昏黃總制祠。

七

妖氛徧地海天昏。又見舟師破虎蹲。
鎮海縣山名棄甲復來難睥睨。守陴皆哭早銷魂。已知將去軍無託。焉得脣亡
齒獨存。百里封疆誰寄命。但餘荒谷報。

君恩

八

明州淨土忽羶腥黯淡姚江隕將星走保會稽吳入越
羣囚治父帥聽刑守關尙未知山道伐木空勞塞海陁
可惜斯人無將畧孤忠耿耿照丹青

烏曰平

允之論

陳曰大將諸將十二首使事雅切婉而多
諷不失溫柔敦厚之旨非徒以左癖見長

諸將

受命戎行已喪師罪臣殉節此其時絕懸何處曾逢使
薄醪無人更貨醫天意不教全一死

國恩猶得免。三危空畱遺愛句。東道寂寞千秋事。可悲。

二

雲臺老將本英雄。名在凌烟畫象中。李廣數奇逢勁敵。
哥舒師敗棄前功。嘉門匹馬西風緊。鄆水扁舟落日紅。
長樂鐘聲太淒慘。江邊歎息有村翁。夷人方在鎮海而
郡東浮橋已有劫
奪行貨者。會余軍門自鎮海來見。
之立斬無賴。一二人郡民始安。

三

彩仗威儀壯矣哉。鄧通千古號多財。祇知海國尊官守。
豈料蠻琛釀禍胎。肆市不聞秦謀戮犒牛。還遣鄭商來。
尙臨廣坐談忠義。苦子西門已洞開。

四

勲名無復望前途高節依稀在月湖豈有從亡供股肉
但聞守藏盡頭須老猶遠戍投邊徼

恩許生還見舊都廉吏口碑真不媿始終相見只迂夫

烏曰大將諸將等篇全用隸事法別是一樣格式此
時舍人篇詠頗多尚有前大將後大將及紀事各若
千首悲感淋漓無婉詩史之目惜兩遭劫火僅存什
二三耳余猶記其紀事詩中有句云遍處便難容五
馬責供何止膳雙雞歎其切台時

陸曰大將諸將諸作感慨時
事淋漓悲壯幾欲擊碎唾壺

鴻年案諸將詩惟第三詠鄧太守者爲辛丑舊作餘
三詩則雖已屬稟至其人作古復更改論定之故第
一詠舒司馬之得免三危第二詠余軍門之長樂鐘
聲第四詠王大令之生還舊都皆辛丑以後事也此

集雖是分體各體亦復編年本當編四詩於壬子癸丑間釋題僅諸將二字恐閱者不知所詠何事故類次於大將詩之詠裕大將軍者而附識其說於此

烟嶼樓詩集卷十五

男隆壽平甫校字

烟嶼樓詩集卷十六

鄞 徐時棟柳泉稿

慈谿葉鴻年吉甫刊

七律下

詒經精舍分賦漢史十一章

蕭何

暴露征衣尙戰攻。鄧侯專任屬關中。東陵畫策身家事。
南鄭追亡社稷功。相國勛名高一代。漢廷指顧失三雄。
咸陽送我贏錢二。猶有恩讎記沛豐。

曹參

壯歲干戈勞績著暮年輔弼政刑寬匹夫遇主成功易
大將趨朝守法難吏舍醉歌如有意兒曹私諫轉無端
暴秦繼世宜清淨宰相崇高豈備官

張良

漢初競說留侯事藉甚聲名已到今銷印但聞忠漢計
奮錐不了報韓心飛鴻高舉柰何曲野雉晨鳴空好音
聊向君王稱道引網羅滿地入山深

陳平

頻年糠覈古猶存負郭窮居斃席門從楚破秦銷壯志
度河入漢壓驚魂無多奇計圖天下第一陰謀誤子孫

陞對數言全大體相臣持重廟堂尊

韓信

不意當年執戟郎已操成算會滎陽市人可戰方眞將
國士無謀請假王羽亦重瞳徒叱咤蒯能相背總荒唐
良弓藏後空飛鳥射雉應憐一矢亡

樊噲

吾愛將軍率性行芒碭同起未知名故宮忽短英雄氣
中禁空畱宦豎情不信斯人終寂寞果然數語壓公卿
當年卮酒鴻門會西楚君臣膽已驚

童曰八句當
作一氣讀

陸賈

開國儒臣太寂寥。陸生清議故超超。漢皇圖治書新奏。
越尉稱臣語不驕。高坐且談天下事。浪遊肯仕婦人朝。
安車駟馬從容去。好時田疇素沃饒。

賈誼

主上崇文治。運開賈生年。少洛陽來新封愛。子煩公傅。
重爲蒼生老。此才謀國經猷歸。練達諫書磊落露風裁。
異時不幸言多中。湘水長流意可哀。

周亞夫

帳中曾爲奪符驚。誰道淮陰善將兵。介冑在身軍禮見。

天王按轡壁門行。他年不拜滎陽詔。成法依然紉柳營。
藩服謗言從此起。退朝目送太多情。

蘇武

凍雪寒冰絕域中。廿年歲月太恩恩。始終無改貞臣操。
親故難忘長者風。帝詔單于歸漢節。天生通國報孤忠。
當年徐趙皆男子。不獨長羅意氣同。

董仲舒

邪說爭鳴各異途。謹遵轍迹是江都。才非王佐通經媿。
家治春秋絕學無。殿上賢良方被詔。關中徵發已防胡。
賈生顛領董生老。閑散人閒兩大儒。

舊評鎮海姚梅伯曰鄭侯賈二詩尤極雄渾

驚人千古卓識又曰樊賈二詩尤極雄渾

鳥曰醞釀深厚斷制精嚴有此

識方可論古有此才方可詠史

王曰詠史諸作才雄識卓學

人詞人均無從望其肩背

童曰詠史詩識力超卓

筆力雄健必傳無疑

劉曰中是盟氏評杜詩云今人作七律堆砌排偶全

無生氣而矯之者又單弱無體裁讀杜諸律可悟不

整為整之妙吾師詠史諸作節奏

自然純乎化境知導源有自矣

陸曰詠史諸作卓識不磨名論不刊迥非人云亦

云至其格律之謹嚴音節之宏亮自是三唐嫡派

余丈夢坪輓詩

二十年前早識公，握衣隅坐尚兒童。每因話舊呼從事，

更為論交拜侍中。少時隨諸兄兄事丈，其後因與嗣君

爲多難避人常咄咄夕陽流水太恩恩只今腹痛菱池
路陌巷猶留長者風

贈金陵朱述之大令

緒曾

脫帽看詩結酒傳有書未擬上荊州勞君自遠來相見
媿我無奇可借畱願以所餘波晉國敢因爭長齒滕侯
高人品格儒生學都是塵寰第一流

烏曰五六
用古入化

二

君家建業我句餘桑梓徵文兩意如顛髓目睛勤愛惜
蝸碑蠹簡費躊躇荒材無補千秋業海國新添一部書

擬刻宋元四明五志近又從先生處借鈔大德昌國志夢寐經年今果得助余將伯敢忘諸先是羅鏡泉以智來司訓鎮海嘗語余此書

三

烟嶼樓前又駐驂高軒過我已經三惠貽手澤先人集先生以手編八頓愈頭風半日談八代文章雄海內一世家集見贈門壇沾在江南夜深把卷圖詩派元禮搜羅未足貪

四

捧檄西來到海濱清風亭子十洲春先生近以收復定容客選名士多高弟吾鄧王丈月農董虛竹蕭竹行笈奇書是故人青眼相期傳世學黑頭好奇宰官身浙中廉

訪家聲舊他日重爲部下民

先生從子莊恪公嘗司臬浙江

舟中望惠泉山懷裕大將軍

謙

惠泉山色開天下不爲名山爲美人自昔中丞開幕府
盡驅脂粉出風塵將星懷絕艷江月歌扇依然佛國春
畱得去思無繼響獨教吳語訾申申

陳曰畏子不敢刪詩所以錄大車
隻手障狂瀾其如狂瀾再倒何

童曰渾灝流
轉神似老杜

野眺

雲外重山竹外村
衿衣野眺近黃昏
落花帶雨紅黏葉
古樹分陰綠到門
眼界已空無意識
月輪初上有微痕

桃源流水渾難辨，且看捕魚坐石根。

咸豐三年十月將盡，忽傳鄉人入寇城中，戒嚴六門，晝閉。於是紛紛遷避，輿馬一空，意緒無聊。作此示四弟子舟季弟石門，並示坐中馮午卿邵又橋。

城頭戍甲未全除，軍帖喧催子夜初。吠影無端狂眾犬，賦草誰爲養羣狙。廿年肉食難干策，滿地兵塵且著書。時余方作宋元四明志校勘記未就席捲倉黃車馬盡，弟兄朋友尙吾廬。

不知樂土更何地。江北江南寇已深。連日閉門忘世事。
頻年思亂識人心。蜚鴻回笑猶巢倦鳥。將棲尙擇林。
聖主中興能勞來。只今于野費哀吟。

王曰第四
句沈痛語

宅邊柳

有序

咸豐五年三月余始居城西門外名之曰城西草堂。
童丈莠君爲余篆題戶冊。它邊有高柳相傳。不由人。
植。初時但見短枝數年遂成大樹。樹下有泉適合吾。
號。此豈所謂因緣者耶。賦詩紀之。

高蔭吾廬美。且清依依似有故人情。何須對此成吾隱。

便可隨時聽鳥鳴。門外未偷陶侃種。城西敢慕萬章名。
先生自號無心合。贏得人呼柳下生。

舊評朱述之曰。五六實實是西門外柳實實是城西柳。先生詩隸事雅切如此。

范沁君同年 邦棧 母張太孺人輓詩

十年前記拂蠻箋。不腆陳辭溯母賢。剛擬八旬重致語。
豈知先歲忽生天。白頭門戶操心久。墨帳科名有子傳。
新卜草堂鄰孟里。巷歌消歇其淒然。

咸豐丙辰九月二十二日由光溪入南山訪陳

東生 德梧

光溪曲曲入雲鄉。秋色深深小雨涼。白飯青芻留遠客。

碧梧翠竹見諸郎滿山試問皆生計避世今知有祕方
廿五年來離別事不嫌情話酒中長道光十二年與君同問字於綱齋王

陳曰桃花源記稱良田美池桑竹之屬人寰卽仙境不必求之世外也

二

阮修貧苦未成婚我作王敦卻造門王先生孤子正燭年長未娶余謀諸
朱絳山倡其事此一諾更無慙祖德廿年同此感師恩
行亦爲之託鉢也多陰德君能不荒唐營室猶徵債寂寞
君大父逢吉翁以二十千付余魏其家風是日以二十千付余
重泉早望孫新賦小詩聊記事好傳高義遍山村

丁巳正月望後二日同秦菁沚運鈞何韻仙二

孝廉馮午卿烏鵲仙余尊社三秀才宋蓮叔觀

察紹蔡李可稼廣文厚田范芾廬明經四弟子

舟遊月波寺

幾輩朋儕與弟昆相將一笑上雲根兩朝古蹟留師相

寺在宋爲史越王之月波樓在明爲余文敏公之五柳莊十里春波到寺門攀竹徑

穿沙印屐繞湖山好樹遮村土牆亂砌題詩石細認當年刻畫痕

年刻畫痕

謝段鏡湖觀察光清惠荔枝時公子小湖司馬

詰宦閩中由海舫新獻時果

久聞風骨是傾城白玉紅紗入眼驚曾爲色香疑舊譜

始知鹽蜜累清名薦盤快洗先生醎拜惠同嘗孝子羹
今日分甘鈴閣下不才轉覺愧詩情

二

銀印緋衫對絳囊小青天頌到蠻荒

浙中呼觀察爲段青天閩人因日公

子爲小青天

海濱琪樹流膏露掌上虬珠傲雪霜坡老豈眞

官爲口白公自喜客同嘗紅塵一騎眞堪笑似箭鄞船

穩渡洋

范石湖新荔枝詩云鄞船荔子如新摘又云趙

方守四明亦以海船自閩中載至耳

豐年

草堂客至啟柴扉聞說鄉村稻正肥雨不爲災猶可喜

人方憂亂況堪饑錢爭當十官無策農得餘三盜亦稀
但祝豐年歌

帝力繫懷塵事早知非

陳子相母王太孺人輓詩

板輿穩坐髮如絲隨意看花笑進卮四世生孫畱老眼
廿年養志有孤兒恐驚動履疏存問卻憶攬衣拜歲時
先大夫與封翁爲執友余兄弟賀歲必拜
太夫人近以太夫人病風不敢驚起居矣
新卜草堂鄰
孟里佐歡不腆獻盤匱

劉曰吾師樂道人善惟不輕以孝行許人而特稱陳
丈之能養志蓋平日固有獨契者非同人云亦云

病無痛癢亦神仙。老福閒身自保年。私願春輝長照地。
豈知我佛忽生天。奉觴未獻松風卷。太夫人年八十時子相屬為壽序余
以入都不果來歲太夫人年九十思踐前諾又新得執
奚鐵生松萱圖將重裝為太夫人壽今皆成空言矣
緋空歌薤露篇惆悵重三圖。畫裏鮮民相對淚。潸然道光
辛丑繪閏重三日聯句圖時六人皆以孤兒事老母庚
戌十二月不肖兄弟首遭大故厥後王稽雲何韻仙烏
釀仙相繼羅終堂之戚圖中人惟子相尚為
人子嘗私為之慶幸不意太夫人復仙去矣

次韻和范雨生丈上綱八十自壽

范叔新詩紀八句。一時竝作有徐陳。竝作命徐陳虞文懿句也子相首和
此詩故吾儕酬和聊乘興。此老生平但率真。冊載後重
及之
周甲子十年前尚守庚申。火善導引之術甬東耆舊如

開社屈指應推第一人

宿陳魚門中翰

政鑰

家見洋燭長身細幹不剪

而明索得十挺賦此報謝

話雨西窗夜欲闌一枝長對玉珊珊固知材短消磨易
始信心粗洞照難旁映欲穿匡鼎壁高燒不掩孟嘗餐
故人索贈非無意聊當投書郢客看

陳曰隨處見道卻不落陳腐一派故佳

二

不剪拳煤到五更檢書起草眼常清玉堂已透紗窗影
金谷何勞綠爆聲同舍有人驚異物乞鄰笑我學微生

葉小峯同年時客余甯王妖燭應相似莫太風狂夜不
明家見此驚喜分贈之

謝陳樹珊駕部政鍾送書

客歲吾廬下視融圖書收拾去匆匆范盧已斷千秋望
范氏天一閣盧氏抱經樓諸書並以前年寇亂散失殆盡湯鄭同歸一炬中縣中湯耕吾懋
才溪上鄭簡香薇君兩家本以網羅遭劫火莫將呵護
多藏書近來大半歸余處問天公故人憐我平生志架上新來幸不空

二

卅年精力費居諸問祕搜奇十萬餘今我更無焦尾本
憑君重見案頭書癡心敢復圖恢復餓眼終當少積儲

試過長文勞寄語還。緬有約近何如。如竊賊水郡時無賴。攬至江北岸爲君從兄魚門中翰所收贖。亂平相見嘗許見還。雖復叢殘然而慰情聊勝無也。故屬君一問之。

有感

朝三暮四只欺狙。今古人心大略如。誰肯芸田眞舍己。笑他緣木强求魚。每每姑妄聽與誦。育育而安召我居。欲慕孫蘇陽羨客。谷風三復轉歔歔。

烏曰浩浩者水育育者魚未有室家而安召我居管子引逸詩語也此全川之以對左氏於本事適合文章天成妙手得之信有是者

二

我友叩須伐木聲。馮驩爲我費經營。謂馮出奇有計來。

相閒受誑無端竟沮行里不擇仁焉得智道于謀室自
難成平生事事堪人告清夜捫心敢不平

起屋

劫後陳方謝越巫敢將夏屋望渠渠出居作室誰從爾
迫雨營巢尙侮予莫怪我真行我法自今吾亦愛吾廬
綢繆牖戶非容易瘠口曉音手拮据

烏曰忽而不
怒微婉可思

寄董覺軒

小築居樓蔽短垣前頭依舊是蔬園架書新有擘經說
戶牖堪題面圃軒甚欲招君於我館每因懷仲畏人言

碧梧未長難棲鳳，萬里長空且翥騫。

鳥曰深情直道
非唯詞令妙品

范雨生丈夫人仇孺人輓詩

陰雨同心五十春，白頭如故敬如賓。教孫教子劬勞德，

何有何亡黽勉身。曾祝破荒非妄語，

范氏先世夫婦多
老壽惟尚未有至

百歲者前年余爲丈入寸壽序有獨違偕老亦傷神。孺人

云將爲世壽范氏破期願之天荒既卒丈扁其帷，椿庭歲月深於海。不見新衣勸著人，

童曰不落
輓詩策曰

補題陳子相瀕江送別圖有序

子相大令以道光己亥捧檄至粵，西明年春遽告歸。

養其同僚聞小芬

勳

爲作灕江送別圖阮素堂

正惠

首倡二律一時宦其地者皆有次和同治丁卯子相
重裝成卷袖至草堂卽用卷中倡和原韻補題其後
記曾浪跡入紅塵拙宦如君總是貧一片熱腸空負腹
半年冷眼忽抽身可憐瘠土無廉吏何況家山有老親
珍重舊時畱畫卷幾人相送到江濱

二

何人笑爾十分癡惜爾年華勸爾思

卷中吳君和作有出處還宜子細思

之句蓋甚惜其去也

宦海豈無飛渡客戲場終有下來時南陔養

志慎初願

歸來未幾尊甫西耕先生卒君以潔白養太夫人者至二十年

西圃吟詩其

故知惟有蠶魚生相在老來還恨讀書遲
君近繪四餘讀書圖余別有題句

贈陳樹珊

交到元方與季方我來下榻只尋常
春風壓酒聯情話舊雨關心是熱腸
分業何嫌多子累消閒翻爲種花忙
支持門戶眞非易回首人琴已渺茫
君兄景山運同卒已七年

二

故人慷慨爲君歌五十年華鬢未皤
聊爾功名中外翰君以議敘得中書科
晚來知遇孝廉科同治乙丑歲浙中書後復就教職
成鄉試君始與賢江湖薄宦家山近
前年謁選詩卷明書年已四十八矣

年客路多而後乃今莫之闕扶搖看與補蹉跎

步月山行投宿寶巖寺

雲山疊疊氣蕭蕭薄醉扶人過石橋萬壑秋聲風似雨
一天夜色月如潮到門院寂僧初定下榻房空鼠亦驕

明日芒鞋穿嶺去墓廬前更有禪寮

由寶巖而入踰戴公嶺爲黃陂先義

行墓在焉墓東南爲旌義山莊山莊之前有金巖寺甚小

答李笙南運同

梓里今多八十翁幾人鬢鑠與君同江淮短簿三春夢
戎馬餘年一笑中老至作詩知入妙酒邊看劍忽生風
前余集東坡武昌詩帖爲聯得此十四字書以贈君今足成之何時把釣雙湖水指點

餘霞滿碧空

二

已拋世事隱湖村。一片聰明是宿根。扁鵲活人無定法。
君精於醫學其法有橐駝種樹亦專門近以屋後隙地
迴非時手所能知者園君時時手排位置新堂構。眼看科名到子孫。又報庭
指教之花交送喜賦詩先與忘年論。
今秋雙桐書屋中荷蘭俱有並蒂花君賦詩見示

烟嶼樓詩集卷十六

男隆壽平甫校字